

DIDZA' ZI'AL BSÖLË'Ë PABLO YÖDZ TESALÓNICA

**Pablo rugapë' Dios bunách
queë' Cristo nacu'ë Tesalónica**

1 Neda', Pablo, dzagquë' neda'
Silvano len bi'i Timoteo,
rugapa' Dios lbi'ili', náquili' queë'
Cristo, len zoali' Tesalónica, nacli'
tuz len Dios lenca' len Xanru'
Jesucristo. Rnaba' lahuë' Xuzru'
Dios lenca' lahuë' Xanru' Jesucristo
uzá' ladxë'ë queëli' len gunë' ga soa
dxi icj ládxi'dau'li'.

**Le rac bë' ta'yejlë' Dios
bunách Tesalónica**

²Rétecztu'-në' Dios: Xclenu', cati'
rajneytu' ca nac queëli' yúgu'tëli'.
Rajnéytecztu' lbi'ili', bi rnabtu'
queëli' lahuë' Dios cati' rulidztu'-në'.
³Lahuë' Xuzru' Dios rajnéytecztu'
ca nac le runli' le réjlë'li' Cristo, len
ca nac dxin runli' le nadxi'ili'-në',
len ca na' náteczli' tsutsu le runli'
löz Xanru' Jesucristo. ⁴Böchi' lza'tu',
Dios nadxi'inë' lbi'ili', ati' nózitu'
gröczë' lbi'ili' Lë'. ⁵Cni nac, le
bdxin queëli' didza' dxi'a runtu'
lban qui, clëg len didza'z, san lëzca'
len yöl-la' huac bdxin queëli', ati'
benë' tsutsu lei Dios Bö' La'y, ati'
gdu ládxi'li' benli' löz lei. Nóziczli'

ca guctu' ga zoali' le nadxi'itu'
lbi'ili'.

⁶Lbi'ili' butsó' cuinli', runli' ca
runtu' netu', lenca' ca benë' Xanru',
le gzxi' lu na'li' xtidzë'ë, ati' zal-la'
szxöni gzxaca' gdi'li', budzjili' le
zóalenë' lbi'ili' Dios Bö' La'y. ⁷Cni
nac, chnacli' tu le nac bë' laugac
yúgu'të bunách ta'yejlë' Cristo nacu'ë
luyú Macedonia len luyú Acaya.
⁸Cni nac, le gzë xtidzë'ë Xanru'
ni'a queëli'. Clëgz luyú Macedonia
len luyú Acaya, san lëzca' yúgu'të
latj gzë didza' ca réjlë'li' Dios. Cni
nac, cutu bi run bayúdx gnatu', ⁹le
ta'guixjö' queëru' la' leygacz bunách
ni' ca benli' netu' ba la'n, len ca na'
butsá' cuinli', buca'nli' yugu' bdau'
guiöj bdau' yag len böacli' queë' Dios
quië gunli' xchinë' Dios ban, Nu nac
gdu Dios. ¹⁰Na'a, rbözli' dza huödë'
Zxi'në' Dios, grujë' yehua' yubá. Dios
buspanë' Lë' lu yöl-la' gut. Nu ni nac
Jesús, Nu ruslá rë'u lu dul-la', cui soa
le gun ga gchuguë' queëru' Dios dza
zi'a za'.

**Xchinë' Dios benë' Pablo
yödzt Tesalónica**

2 Böchi' lza'tu', nóziczli' cutu
guc daduz dxin queë' Dios

bentu' cati' ni' bdxintu' ga zoali'.
²Nózili' ca guc queëtu' lu yödZ
 Filipos, ca na' gzxaca' gdi'tu', ati'
 glua' dö' queëtu' bunách ni'. Ni'r
 cati' bdxintu' ga zoali' guctu' rugu
 ladxi' le gzóalenë' netu' Dios
 queëru', ati' bentu' lban lauli' qui
 didza' dxi'a le budödë' lu na'tu'
 Dios. Cni bentu' zal-la' szxöni
 guladá'baga' netu' bunách ladzli'.
³Cati' ni' buchiztu' icj nagli'
 xtidzë'ë Dios, bë'tu' didza', clëg
 le nazí' ye'i netu', len clëg bi gzë
 ládxi'tu' le dë queëli', len cutu gzxí'
 yé'itu' lbi'ili'. ⁴Le nuzxöni ladxë'ë
 netu' Dios, budödë' lu na'tu' guntu'
 lban qui didza' dxi'a queë', ati'
 cniz rui'tu' didza'. ⁵Nózcizli' gatga
 bé'lentu' lbi'ili' didza' le gun zxön
 lbi'ili', len cutu bubj' tsahui' cuintu'
 ca run nu bi rzë ladxí' le dë queëli'.
 Nözcznë' Dios nac cni. ⁶Cutu gdiljtú'
 yöl-la' ba le nac qui yödZlyú ni, lë
 na' cu'li' netu' lbi'ili', len clëg le
 la'gú'u netu' bunách. Zal-la' dë lu
 na'tu' gna bé'itu' lbi'ili' le nactu'
 gbaz nasölë'ë Cristo ⁷gzóalentu'
 lbi'ili' dxi'i ládxi'dau', bentu' ca
 runnu xna'cbi' bi'i huëndau', run
 chi'inu lecbi' dxi'i ládxi'dau'. ⁸Cni
 guc, bdxí'itsquitu' lbi'ili', ga bdxintë
 gú'nitú' udödtu' lu na'li', clëgz
 didza' dxi'a queë' Dios, san yelati'z
 cugú'c udödcztu' yöl-la' na'bán
 queëtu', le nadxí'itsquitu' lbi'ili'.
⁹Rajneyli', böchi' lza'tu', ca na' guc
 cati' ni' bentu' lban lauli' qui didza'
 dxi'a queë' Dios, ca béntecztu' dxin
 baníg, ati' rël len të dza bentu' dxin
 cui usaca' zi'tu' nituli' lbi'ili'.
¹⁰Lbi'ili' na' réjlë'li' Cristo, huac
 gunli' lna' lau, ati' nözcznë' Dios ca
 na' gdá'entu' lbi'ili' gdu ca rdzag

ladxë'ë Dios len gdu dxí'adau',
 len ca na' nutu nu gac bi gnë
 qui. ¹¹Lëzca' cni nózili' ca bentu'
 ca runë' bönni' quecbi' zxi'në',
 buchiztu' icj nagli' len butiptu'
 ládxi'li' tu tuli'. ¹²Busa'tu' ládxi'li'
 gunli' ca ral-la' gun nu naqui queë'
 Dios. Lëczë' bulidzë' lbi'ili' quië gac
 tsazli' ga na' rna bë'ë Lë' lu yení'
 queë'.

¹³Qui lë ni na' ca', rétecztu'-në'
 Dios: Xclenu'. Cni runtu' le gzxí' lu
 na'li' xtidzë'ë Dios le byónili' bë'tu'
 didza', clëg ca xtidza' bunáchz, san
 ca le nactë nac, xtidzë'ë Dios nac.
 Xtidzë'ë na' run dxin lu icj ládxi'dau'li'
 lbi'ili', réjlë'li' Cristo. ¹⁴Böchi' lza'tu',
 rac queëli' ca rac quegac bunách
 queë' Dios, nup náquigac queë'
 Jesucristo, nactu'ë luyú Judea. Cni
 nac le chgzxaca' gdi'li' szxöni lu
 na'gac bunách uládz queëli', la' tuz
 ca na' gulazaca' gulagui'ë lequë' lu
 na'gac bunách uládz quequë', nup ni'
 nacgac bönni' judío. ¹⁵Yugu' bönni'
 judío na' guludöddë' Xanru' Jesús len
 guludödcdë' ca' bönni' glu'ë didza'
 uláz queë' Dios. Gulabía ládxi'quë'
 len gululaguë' ca' netu'. Cutu tunë' le
 rdzag ladxë'ë Dios, le cuta'lé'inë' dxi'a
 yúgu'të bunách gza'a. ¹⁶Tu'zaguë'ë ca'
 netu', cui guntu' lban laugac bunách
 gza'a na' cunababgac lequë', le
 ruí'lentu' leygac didza' quië lulá. Cni
 rac, tu'zánteczë' dul-la' nabága'quë',
 len chnabága'quë' zxguia' le run ga
 ghuguë' quequë' Dios.

**Pablo rë'nnë' tsajyúë' bóchi'ru'
 nacu'ë Tesalónica**

¹⁷Na'a, böchi' lza'tu', ruhuí'nitú'
 ca runë' bönni' uzëb le nulá'alentu'
 lbi'ili' tu chi'idau', san zal-la' cutu

rlé'itu' lbi'ili', cutu nal ládxi'tu' lbi'ili'. Qui lè ni na', rui' ládxi'rtu' ulé'itu' lauli', le rzètsca ládxi'tu' cni guntu'. ¹⁸Qui lè ni na' ca' gú'nitu' guidtu' ga zoali', ati' neda', Pablo, le nactè bè' ladxa'a guida' chop tsonn lzu, san buzaga' xnöztu' Satanás tu' xöhui'. ¹⁹¿Bizxa caz nac le run ga runtu' löz, o le run ga rudzjitu', o le ral-la' gdél-li'tu', le uzi'tu' xbey lahuè' Xanru' Jesucristo cati' huödè'? ¿Naru' clèg lbi'iczi' na'?

²⁰Lbi'iczi' nacli' le run ga nactu' bica' ba, len le run ga rudzjitu'.
3 Qui lè ni na', cati' cutur guc gua' glentu', ben xtídza'tu' uga'ntu' choptu' lu yödZ Atenas ²ati' bsóla'tu'-bi' ga zoali' bi'i bóchi'ru', Timoteo. Nachi' bi'i huen dxin queè' Dios, rúnlenbi' neda' tsazxón lban qui didza' dxi'a queè' Cristo. Bsóla'tu'-bi' ga zoali' quiè cuéqui' lbi'ili' tsutsu, len uchizbi' icj nagli' ca ral-la' tséjlè'li' Cristo, ³cui soa nu gac chop ladxi' ni'a qui le tu'saca' zi' netu' bunách ni, le nóziczli' zoaru' yödzyú ni quiè gua' glenru' le cni. ⁴Lèzca' cati' ni' gzóalentu' lbi'ili', gdíxjöi'tu' lbi'ili' ca chzoa gac queèru' le lusaca' zi' rè'u, gac ca na' chguc queètu' ati' nóziczli' lè ni. ⁵Qui lè ni na', cati' cutur guc gua' glena', bsóla'a-bi' ga zoali' bi'i Timoteo quiè dudíxjöi'bi' neda' ca nac queèli' ca réjlè'li' Cristo, len chqui' cutu glu'u lbi'ili' nöz dul-la' tu' xöhui', nu na' rgu'u bunách nöz dul-la', len chqui' cubóac daduz dxin na' bentu' ga zoali'.

⁶Cati' buza'bi' ga zoali' bi'i Timoteo, len budxinbi' ga zoatu', gdíxjöi'bi' netu' le nac dxi'a, bè'bi' didza' ca na' réjlè'li' Cristo, len ca

na' nadxí'igacli'-nè' böchi' lza'ru', len ca na', lu yöl-la' dxi'i ladxi' queèli' rajnéyteczli' netu', lenca' ca na' rzè ládxi'li' ulé'ili' netu', ca na' netu' rzè ládxi'tu' ca' ulé'itu' lbi'ili'. ⁷Qui lè ni na', böchi' lza'tu', cati' ni' gzxaca' gdi'tu' yúgu'tè lè ni len zian le guc queètu', bdxin queètu' didza' bui' zxön netu' cati' byónitu' ca réjlè'li' Cristo. ⁸Na'a, nuhuóac ládxi'tu' le ryónitu' röl'li' tsutsu ca réjlè'li' Xanru'. ⁹¿Nacxcz gac guiètu'-nè' Dios: Xclenu', ca ral-la' guntu' ni'a qui yúgu'tè le run ga rudziji ládxi'tu' lahuè' Dios queèru' ni'a qui le nacli' lbi'ili'? ¹⁰Bayúdx rulidztu'-nè' Dios, rnabtu' lahuè' rël len tè dza quiè gac ulé'itu' lbi'ili' len usa'tu' le ryadzj queèli' ca nac le réjlè'li' Cristo.

¹¹Na'a rnabtu' lahuè' Xuzru' Dios lenca' Xanru' Jesucristo, cu'è netu' nöz ga gdxintu' ga zoali'. ¹²Lèzca' rnabtu' lahuè' Xanru' gunè' ga xön len gac gdu ca nadxi'ili' lza'li' tuli' yetuli', len ca nadxi'ili' yúgu'tè bunách, ca na' netu' nadxi'itu' ca' lbi'ili'. ¹³Rnabtu' ca' lahuè' gunè' ga gac tsutsu len gdu dxi'a icj ládxi'dau'li' lahuè' Xuzru' Dios ca rajlóz le nac la'y, gunè' cni ga gdxinr dza huödè' Xanru' Jesucristo, dzaggac Lè' bunách la'y queè'.

Le runru' le rdzag ladxè'è Dios

4 Yetú ca', böchi' lza'tu', ni'a queè' Xanru' Jesús ráta'yutu' lauli' len ruchiztu' icj nagli' quiè gunli' ca nac le chnazèdli' lu na'tu' ca ral-la' gunli' le rdzag ladxè'è Dios. Ca na' chrunli', ca'tecz gunli'. ²Chnóziczli' yugu' le gna bé'itu' lbi'ili' uláz queè' Xanru' Jesús. ³Le

rè'nnè' Dios nac gacli' gdu dxi'a, len cutur gunli' le cunác, ⁴len gnózi'li' tu tuli' nacx ral-la' sóalenli'-nu ngul qui queëli' gdu ca rajlóz le nac la'y, len gunli' lecnu ba la'n. ⁵Cutu ral-la' sóalenli'-nu ngul queëli' lu yöl-la' rzè' ladxi' le cunác, ca na' tun bunách cunababgac Dios len cunúnbè'gac Dios. ⁶Ca nacgac lè ni, nutu nu ral-la' tód bè'i len cusí' ye'i böchi' lzè'i bagachi'z, le gchuguè' quegac yúgu'tè nup tun le cni Lèczè' Xanru', gunè' ca na' chgudxtu' lbi'ili' len bentu' lna' lau qui lauli'. ⁷Dios bulidzè' rè'u, clèg quiè gunru' le cunác, san quiè gacru' gdu dxi'a. ⁸Cni nac, nu ruzóa tsla'l lè ni, clèg bunáchz ruzóa tsla'l, san Dioscz ruzóa tsla'l, le bsölè'è queèru' Dios Bò' La'y Nu rui' cni didza'. ⁹Cutu run bayúdx uzuja' queëli' lu guich ca ral-la' gdx'i'icli'-nè' böchi' lza'li', le chnazèdli' la' lbi'izli' lu nè'è Dios gdx'i'ili' lza'li' tuli' yetuli'. ¹⁰Le nactè nadxi'icli'-nè' yúgu'tè böchi' lza'ru' nacu'è luyú Macedonia. Na'a, ráta'yutu' lauli', böchi' lza'tu', quiè gdx'i'igacrl'i'-nè' ca' böchi' lza'li'. ¹¹Ráta'yutu' lauli' ca', güi' ládxi'li' cözli' dxí'adau', len gunli' yugu' le dè lu na'zli', len gunli' dxin len na'czli' ca na' chgna bé'itu' lbi'ili'. ¹²Gna bé'itu' lbi'ili' cni quiè gac gunli' le nac dxí'adau' laugac nup cunababgac lbi'ili', len cni gac, cutu bi yadzj queëli'.

Ca gac cati' huödè' Xanru' Jesucristo

¹³Lèzca', böchi' lza'tu', ré'nitu' gnózi'li' ca rac quegac nup chnatgac, cui huí'nili' ca tun yezica' bunách cuzóa le tun löz. ¹⁴Chqui' réjlè'ru' gutiè' Jesús len bubanè', lèzca' cni

ral-la' uzxöni ládxi'ru'-nè' Dios gunè' ga huódlengac tsaxzón Jesús nup ni' chglat len gulayejlè' Lè'.

¹⁵Qui lè ni na' rguíxjöi'tu' lbi'ili' xtidzè'è Xanru' le rna cni: "Rè'u ni zoaru' nabanru' len uga'nru' ga gdxinr dza huödè' Xanru' Jesucristo, cutu tsajtsagru'-nè' Cristo zi'al ca nup chglat." ¹⁶Cni gac, le huötjè' Lèczè' Xanru' grujè' yehua' yubá, ati' yön chi'è, len yöl-la' uná bè' ulidzè', ati' yön ca' chi'è gbaz la'y blau, ati' yön ca' trompeta queè' Dios, ati' lubán nup na' chglat len gulayejlè' Cristo. ¹⁷Ni'r rè'u ni zoaru' nabanru' len naga'nru' luyú ni, uchisè' rè'u tsaxzón len lequè' lu böaj luzxbá quiè tsajtsagru'-nè' Xanru' lu bö'z. Cni gac, sóalenteczru'-nè' Xanru'. ¹⁸Qui lè ni na', gul-huí' xzön lza'li' tuli' yetuli' ca nacgac didza' ni.

5 Na'a, ca nac dza na' o rèl na' cati' lac lè ni, cutu run bayúdx uzuja' queëli' lu guich, böchi' lza'tu'. ²Lbi'ili' chnóziczli' dxi'a ca gac dza cati' huödè' Xanru'. Gdxinè' tu tsalz ca rdxinè' gban chdzö'l. ³Cati' la'ná bunách: "Rac dxi'a queèru' len cutu bi gac queèru'", ni'r la' gdxintè le usnít lequè', lè na' gdxin quequè' ca na' rdxin le rzaca' rgu'nu ngul chzoa soabi' bi'idau' queènu, ati' nutu nu nutsa' ladj bunách yödzlyú ni nu ulá cati' gac lè na' ral-la' gac. ⁴Na'a, böchi' lza'tu', cutu zoali' chul nit, len qui lè ni na' cutu gdxin queëli' bagachi'z dza ni' ca rdxinè' gban. ⁵Yúgu'tèli' nacli' bunách qui yení' len qui lahui' dza. Cutu nacru' bunách qui chdzö'l len clèg qui le nac chul. ⁶Qui lè ni na', cutu ral-la' tód yèl lauru' ca rac

quegac nup cunababgac rè'u, san ral-la' uspán ládxi'ru' len cözru' ba'a ládxi'dau'. ⁷Nup tas, chdzö'l tas, len nup ta'zudxi, chdzö'l ca' ta'zudxi. ⁸Na'a, rè'u ni, nacru' qui lahui' dza len ral-la' cözru' ba'a ládxi'dau', le chnácuru' zxaru' le run chi'i rè'u, le nac yöl-la' rejle' queëru' Dios len yöl-la' nadxí'i, ati' le runru' löz ularu' nac ca lu'u guia le run chi'i icjru'. ⁹Cni nac, le nuzóè' rè'u ni Dios, clég quiè gdxinru' ga gchuguè' queëru', san quiè ularu' le runru' löz Xanru' Jesucristo, ¹⁰le gutiè' uláz queëru' Jesús quiè soaru' gbanru' tsaxón len Lè' cati' huödè', zal-la' chnatru' o soaru' gbanru' dza ni'. ¹¹Qui læ ni na' ral-la' utipli' ládxi'li' tuli' yetuli' len gunli' tsutsu tuli' yetuli' ca na' chrunli'.

**Pablo ruchiziè' icj nagquè'
böchi' lzè'è ta'yejlè'è Cristo**

¹²Ráta'yutu' lauli', böchi' lza'tu', gúnbè'li' nup tun xchinè' Xanru' ga zoali', nup na' ta'ná be'i lbi'ili' uláz queè' Xanru', len tu'sá' ládxi'li'.

¹³Ráta'yutu' lauli' ca', gunli' lequè' ba la'n lu yöl-la' nadxí'i queëli', le tunè' dxin na'. Gul-cóz dxí'adau' tuli' len yetuli'.

¹⁴Lèzca' cni ruchiztu' icj nagli', böchi' lza'tu', quiè usa'li' ládxi'gac nup cutún dxin, len utipli' ládxi'gac nup tu'huóa ládxi'gac, len gáclenli' nup cunác tsutsu ca ta'yejlè' Cristo, len gacli' nöxj ladxí' laugac yúgu'tè bunách.

¹⁵Gul-gún chi'i cuinli' cui uzí' la lza'li', cui gua'li' dö' qui nu rua'

dö' queëli', san gul-güí' ládxi'li' gúnteczli' le nac dxi'a qui lza'li' tuli' yetuli' len quegac yúgu'tè bunách.

¹⁶Gul-dzjítecz ¹⁷len gul-lídzteczè' Dios ¹⁸len gul-guíé' Lè': "Xclenu'." Cni ral-la' gunli' ca nac yúgu'tè le rac queëli', le nacgac læ ni le rè'nnè' Dios gunli' le nacli' queè' Jesucristo.

¹⁹Cutu guzóa dxili' le rulidzè' lbi'ili' Dios Bö' La'y ²⁰len cutu guzoali' tsla'l xtidzè'è bönni' ru'è didza' uláz queè' Dios ²¹san gul-sí' bè' yúgu'tè. Gul-sí' lu na'li' le nac dxi'a ²²len cutu bi gútsa'li' le cunác.

²³Lèczè' Dios, Nu run ga zoa dxi icj ládxi'dau'ru', gunè' ga gacli' gdu dxi'a, ati' gun chi'è bö' nacczli', len icj ládxi'dau'li' len gdu ca nayá' nabinli', ati' nutu nu gac bi gnè queëli' dza ni' huödè' Xanru' Jesucristo. ²⁴Runè' ca rnè' Dios, Nu bulídz lbi'ili'. Lèczè' gunè' yugu' læ ni.

**Pablo rgu'è lu në'è Dios
yugu' böchi' lzè'è**

²⁵Böchi' lza'tu', gul-lidzè' Dios gnábili'-nè' gáclenè' netu'.

²⁶Gul-gáp Dios yúgu'tè böchi' lza'ru', unída'li' lequè' lu yöl-la' nadxí'i queëli'.

²⁷Ni'a queè' Xanru' Dios rna bé'ida' lbi'ili' ulabli' guich ni laugac yúgu'tè böchi' lza'ru' nababquè' Cristo.

²⁸Rnaba' lahuè' Xanru' Jesucristo uzá' ladxè'è queëli' le nacgac dxi'a queè'. Ca' gac.